

Miembronan di ATSA tin masha inversion pa haci

Pa upgrade nan producto

DURANTE e reunion di Aruba Timeshare Association, durante free-word tur hotelero a expresa nan satisfaccion cu e ocupacion di nan propiedad durante off season na Aruba y ta raporta cu nan ta preparando p'e temporada druk di vakantie familiar den zomer.

E hotelero Joe Najjar a informa cu casi 3.5 miyon florin lo wordo uza dor di Tourism Product Enhancement Fund pa un variedad di proyecto, di mas bari di sushi riba nos beachnan pa boeinan den zona di landa, y ankernan permanente na sitionan di snorkel.

Marriott Surf Club a anuncia un renobacion di un total di \$16 miyon. Casa Del Mar lo ta cabando e parti exterior di su edificio cu \$8 miyon destina p'e proyecto.

E plannan p'e parti interior di e kambernan ta den consideracion pa proximo aña.

Playa Linda ta den su ultimo fase di

renobacion cu a cuminsa na 2011. E hotel ta informa nan satisfaccion cu e proyecto di rehabilitacion di e beachnan te cu awe.

Caribbean Palm Village a informa tocante di un proyecto in-house di panelnan solar cu ta andando, mientras cu Tropicana Resort ta continua cu nan redesign y modernisacion cu ta bayendo slow, pero continuo.

Marriott Ocean Club a revela un inversion di \$32 miyon, den un aspecto completamente nobo, un estilo Caribeño modernisa y comfortabel den e lobby y e villanan.

Jurgen van Schaijk di Amsterdam Manor a expresa su preocupacion pa cu e mantencion di Eagle Beach cu 600 bishitante di barco crucero cu ta wordo manda n'e costanan varios biha pa siman sin ningun hende cu ta monitor of supervisa na manera adecuada.

Costa Linda Beach Resort ta den renobacion di su mueblenan y a co-

munica cu su Frangipani Suites recien construi ta full cla y y full geboek.

Aruba Beach Club cu tin 6.5 miyon florin warda pa renobacion ta contento di por cuminsa e proceso pronto. Paradise Beach Villas a relata cu nan lo drecha e bañonan publico, y cu aprobacion di Minister, ta preparando pa drecha e caminda y e acera parti panort di e hotel.

La Quinta, cu a celebra 30 aña, a comparti nan plannan extensivo pa remodela y modernisa tur cos, di e logo te cu e lobby, y tambe rebranding di e propiedad despues di tres decada, rond di e tema di conservacion. Cada kamber lo tin nomber di un parha local, y en general, e hotel lo comberti den un organisacion mas respetuoso di medio ambiente.

E hotelero Andy Osbourne a pidi e hotelnan pa nan tuma contacto cune si nan ta interesa pa comparti e compra di cuminda y bebida ecologico, cu lo bira un ley riba nos isla den un futuro cercano.

